

EUSKARA. 'Euskarari, zor zaiona' kanpaina

Bi milioi eta erdi pezeta lortu ditu euskararen aldeko objekzio fiskalak

Oinarriak elkarguneak antolatutako kanpainarekin bat egin dute 550 lagunek

Alberto Barandiaran | IRUÑEA

Oinarriak elkarguneak bi milioi eta erdi pezeta pasatxo (ehun mila liberatik goiti) bildu du *Euskarari, zor zaiona* objektzio fiskalerako kanpainaren barruan.

Atzo amaitu zen Nafarroan errenta aitortpena egiteko kanpaina, eta 550 lagunek baino gehiagok bat egin dute euskaltzaleen elkarguneak bultzatutako kanpainarekin. Bultzatzailerek balorazio ona egin zuten atzo kanpainaz.

Lehen milioia, Udako Euskal Unibertsitatearendako

Ekimena apirilean martxan jarri zenetik egunerokoa izan da

norbanakoen atxikimenduen
jarioa.

Hilabete eskasa igaro zela, jada milioi bat pezeta zegoen bilduta Euskaingintza izenarekin horretarako zabaldutako kontu korrontean. Orduan, eta kanpaina abiatzean iragarri zen bezala, laguntza eman duten elkarteen artean –Ikastolen Elkartea, Sortzen-Ikasbatuaz, Euskara Kultur Elkargoa, udal euskara zerbitzuak, Karrikiri, AEK, IKA eta hainbat sindikatu...– diruarekin zer egin eztabaidatzen hasi zen.

Hainbat proposamen baztertu eta gero lehen milioia Udako Euskal Unibertsitateari (UEU) ematea erabaki zen.

JOXE LACALLE

'Euskarari, zor zaiona' kanpaina apirilaren bukaeran abiatu zen.

UEUk 3,5 milioi pezeta jaso zituen iaz Nafarroako Gobernutik, eta 200.000 pezeta Iruñeko Udaletik. Bi erakunde horiek ukatu diote aurten diru laguntza, «unibertsitate izaerarik ez izateagatik».

Oraindik egin daiteke objekzio fiskala

Errenta aitorpenari objekzio fiskala egiteko asmoa Nafarroako Gobernuaren hizkuntza politikaren norabideak ahalbidertatu zuen.

Hainbat euskaltzale euskarari «maitasun aitorpena» egiteko bideak jorratzen hasi ziren orduan, eta zergapekoek Gobernuaren neurrien artean «desadostasuna eta errebeldia» agertzeko baliagarria izango zelakoan abiatu zuten kanpainak.

«Zerbitzuak edukitzeko ordaintzen ditugu zergak», azaldu zuen bultzatzailetako batek aurkezpen egunean, «baina Gobernuak ez digu euskarazko zerbitzurik eman nahi izan. Ob-

jekzio fiskalaren bidez, gure zergen parte bat euskararentzako politika egokiak ahalbiderratu ahal izango ditugu».

Nahiz eta errenta kanpaina jada ofizialki amaitu den, objektzio fiskala egiteko aukera badago oraindik Nafarroan. Horretarako, egindako aitorpenari zuzenketa egitea besterik ez dago. Zergapekoak elkarre laguntzaileetara jo behar du, beraz, eta kontu korrontean sartutako diruaren agiriarekin instantzia bete.

